

Date – 24/06/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Health Minister Pi Lalrinpuii'n ZMC&H, Falkawn ah Lung natna leh Thazam natna enkawlin an zai thei tawh dawn tih a sawi.
2. LESDE Minister Pu Lalnghinglova Hmar chuan thalaite thiamthil tih pun a pawimawh tih sawiin zirna lama dinhmun sang thlenglo tan thiam thil eizawnna ah a hman theih tih a sawi.
3. Chanchinbumi P.Naraynan hnenah civil mite chawimawina sang ber Padma Vibushan hlan a ni.
4. FIFA World Cup khelk mekah Portugal captain, Cristiano Ronaldo chuan World Cup record thar siamin World Cup tum 6-a goal thun vek awmchhun a ni thei.

<><><>

HEALTH MINISTER

Health Minister Pi Lalrinpuii'n ZMC&H, Falkawn ah Lung natna leh Thazam natna enkawlin an zai thei tawh dawn tih a sawi.

Pi Lalrinpuii hian social media kaltlangin he thu hi a sawi a, ZMC&H ah Cardiothoracic & Vascular Surgery an tan thar tih sawiin heng bakah hian ICCU (Intensive Cardiac Care Unit) chu Zoram Medical College & Hospital ah bultan ani a ti a, Doctor thiam tak tak nen heng natna bik nei damlote an zai thei tawh dawn tih a sawi.

Minister chuan Natna khir khan, Lung natna leh Thazam enkawlina kawngah mel lung pawimawh tak phun a ni chu lawmawm atih thu sawiin damlo te'n phai lam pan buai ngai lo a, ZMC&H ah inenkawlina tha tak an dawng thei tur chu lawmawm atih thu sawiin project chu CSR fund hmanga tihhlawhtlin ani tih a sawi.

<><><>

SUNFLOWER

Khawzawl District Agriculture Office hmalaknain nikum khan Khawzawl District-a khaw 6 - Khawzawl, Rabung, Kawlkulh, Khawhai, Sialhawk leh Biate khuahte chhungkaw 94 in, Tin 122 a zauah Nihawi (Sunflower) an ching a, khaw kheng leh khawvawt vangin beisei angin Nihawi hi tha lo mahse Kg. 6378.75 an thar chhuak thei a ni.

Khawzawl DAO Pi Lallawmzuali hnen atanga thudawn danin Nihawi ching tur hian khaw 6-ah hian nikum November thla khan hmalak tan a ni a, April leh May khan Nihawi te hi sengin khaw 6-ah hian Kg. 6378.75 lai an thar chhuak a ni. Agriculture Department chuan Nihawichi te hi a thlawnin a hriak an hersak mek a, a hriak an her chhuahte hi Litre 1 a packaging siamsakin loneituten anmahni thar chhuah ngei Tel hrisel an ei theih nan an loneitute hnenah Tel te hi an hlan let leh

dawn a. Loneitute hian an tel tharte hi an hralh duh a nih pawhin Agriculture Department hian a hralhna tur an ngaihtuahpui leh dawn a ni.

<><><>

LESDE MINISTER

LESDE Minister Pu Lalnghinglova Hmar chuan thalaite thiamthil tih pun a pawimawh tih sawiin zirna lama dinhmun sang thlenglo tan thiam thil eizawna ah a hman theih tih a sawi.

Industrial Training Institute (ITI), Aizawl-a New Age Technology Skill Lab a hawna ah he thu hi a sawi a, Minister chuan Mizo thalaite tam tak ten thiam thil ti hmasawn tura training an zawm chu lawmawm atih thu sawiin thiam bik neih a pawimawh a ti a, khawvel hmasawna zelah thiamna a inher rem zel tih sawiin eizawna tlak hna tam tak a awm thei dawn tih a sawi.

Pu Lalnghinglova Hmar chuan Bharat Forge-te nen thawkhova New Age Technologies zirna Skill Lab an din chu lawmawm a tih thu leh Mizoten an tangkaipui ngei a beisei thu a sawi a, Mizoram tan hmasawna a nih ngei a beisei thu sawiin, hei hian zirna hi a thlak danglam thei dawn a ni, a ti bawk.

Adviser to CM Pu TBC Lalvenchhunga pawhin thu sawiin, skill lab tha tak mai Mizoramin a nei thei chu lawmawm a tih thu sawiin, zirlaite chu thiamna rintlak zirchhuahpui ngei turin a chah a ni.

<><><>

DM&R MINISTER

DM&R Minister Prof. Lalnilawma'n Mizoramah ruahtui a tlak tam avangin chhiatna hrang hrang thleng thei lakah mipuite fimkhur a ngai tih a sawi.

Disaster Management & Rehabilitation Department hotute leh mithiamte nena chhiatna thleng thei chungchanga inven dan an sawihona ah he thu hi sawiin Minister chuan fur ruahtui a tlak tam avangin mipuiten harsatna nasa zawk an pumpelh theihna turin lei laih dan, insak dan leh lei vung paih danahte fimkhur a ngai, a ti a. Ram changkang zawkte tihdan entawna, an hmalak tawh dante zirchianna neih a ni chu lawmawm a tih thu a sawi.

Nimina thutkhawmah hian khuarel chhiatna laka lo inven dan mai bakah lirnging leh leimin lei tawlh kaihhnawih a lo thlen thulh pawha inrinlawk dan tur te, lirnging leh leimin lo thlen pawha chet lak dan tur chungchang an sawi a ni.

<><><>

GAC

Aizawl-a Government Aizawl College Building chu Mizoram Presbyterian Church, SYNOD hnenah nimin khan Higher & Technical Education Minister Dr. Vanlalhlana kaihhraina hnuaiah hlan a ni.

He hun hi Planning & Programme Implementation Department Committee Room-ah neih niin, Mizoram sorkar aiawhin Higher & Technical Education Department Secretary Dr. Lalrozama leh Mizoram Synod moderator Rev John Raldosanga ten inremna thuthlung an ziaak a ni. Inremnaah hian Mizoram Synod chuan building hlut zawng (depreciated value), sawrkar dan ding lai anga chhut chhuah sa cheng vbc 3, nuai 18, sing 9, 2,300 chu Mizoram sawrkar H&TE Department ah chhung lutin, pawisa a chhun luh ni atang hian Government Aizawl

College Building, Sikulpuikawn ami neitu nihna chu Mizoram Presbyterian Church kutah a awm nghal dawn a. Hei bakah hian hemi Building luah tute awm zui zel dan tur chungchang pawh felfai takin inremna lehkha ah hian ziah a ni baw.

Higher & Technical Education Minister Dr. Vanlalhlana chuan Aizawl College Building chu zirna lam ngaihven, mi rintlak tak te kuta a awm tur chu ngaihthat thlak a tih thu a sawi a. Mizoram synod-in a hlah ber chu Finance department in an kaw bo mai ang tih a ni a ti a. Finance dept. enkawltu Chief Minister Pu Lalduhoma chuan hemi chungchangah hian hlahthawn tur a awm lova, a hmanna tur an neih hunah a rang thei ang berin a pek chhuah tur thu tukin khan a hrilh tih a sawi a ni.

Aizawl College hi kum 1975 August ni 25, khan din a ni a, Building nei mumal loin hmun hrang hrangah class neih a nih hnuah Sikulpuikawna Sikulpui leh Sikulsen-te chu Sorkar kuta a awm lain a compound-ah Govt. Aizawl College building sak a ni a. Kum 2010 Synod Inkhawmpui agenda General 33-in a rel anga Sikulsen (Govt. Boys' Primary School) leh Sikulpui (Govt. Boys' Middle School) te sorkar kut atanga la let leh tura hmalakna kalzelah kum 2019 May ni 29 khan Sorkar chuan Mizoram Synod kutah a hlan let a. Kum 2018 February ni 26, khan Mualpui-ah Govt. Aizawl College campus thar tur chu khatih hunlaia Chief Minister Pu Lal Thanhawla'n a hawng a. Tunah hian a tam zawk insawn tawh mahse Sikulpuikawna college building-ah hian MA leh BA 1st Year classroom bakah room engemaw zat an la luah a. He building hi Mizoram Synod chuan kum 2024 December ni 10 khan zirna leh a kaihhnawih hrang hrang atana hman tangkai a nih theih nan Sorkarah lehkha a thehlu a. Aizawl College building chhuahsan dan tur hi GAD kaihhruaiin H&TE Dept. leh PWD te nen ngaihtuah niin, draft committee din a ni a. Draft agreement (final draft) hi chu kumin March ni 23, khan peih niin Mizoram sorkar chuan Mizoram synod kutah a hlan ta a ni.



12 YEARS OF NDA GOVT

Prime Minister Narendra Modi kaihhruai NDA sawrkar kaltlanga tanpuina dawngtu Tuipui South khuaa cheng ten an chhawr tangkai thu an sawi.

Hnahthial-a Akashvani Correspondent PC Lalhmangaihzuai'n Tuipui South-a cheng sawrkar laipui scheme chhawr tangkaitu hrang hrang a kawmna ah mipuiten an chhawr tangkai thu an sawi a, hamthatna hrang hrang an dawn chuan an khawsak a ti awlsam an ti a, chenna in neilo ten sawrkar kaltlangin chenna in an neih thu an sawi a, PM-Kisan kaltlangin loneituten tanpuina an dawng tih sawiin Ayushman Bharat hnuai Golden Card nei ten an hman tangkai thu an sawi baw.

Prime Minister Narendra Modi kaihhruai NDA sawrkar hian kumin hian a kum 12-na a tling a, hemi pual hian Akashvani News Aizawl chuan sawrkar laipui hmalakna hrang hrangah mithiamte a kawm a, hengte hi Akashvani News Aizawl youtube channel leh Social media hrang hrangah hmuh leh ngaihthlak theihin a awm a ni.



MZP

Mizo Zirlai Pawl (MZP)-in Mizoram-a Special Intensive Revision tih mekah kum 2005 E-Roll leh roll thar ber- kum 2024 E-Roll khaikhinin Chakma khua

bikah vote percent punna sang lutuk chu ennawn tha leh turin Chief Electoral Officer an ngen.

MZP President Dr C. Lalremruata chuan nimin khan Aizawl Press club-ah thuthar thehdarhtute kawmin, MZP chuan Mizoram-ah Special Intensive Revision (SIR) dik leh felfai taka kalpui a nih theihna turin tun hma atanga a ram mi ten ram dang mi pun chakna thin Assembly Constituency-a khaw hrang hrang a enfiah a ti a. Hetah hian SIR-in a behchhan kum 2005 E-Roll leh roll thar ber- kum 2024 E-Roll an khaikhin a, Chakma khua bikah vote percent punna sang lutuk leh 2005 E-Roll a khaw awm lo, a hnu a khaw 97 awm tharte leh India leh Bangladesh khua leh tui nihna nei kawp mi engemawzat bakah E-Roll a House number awm lo pawh hmuh chhuah a nih thu a sawi a. Hemi chungchangah hian, Chief Electoral Officer (CEO) hnehah complaint thehluh a nih tur thu sawiin, Complaint a tarlan khaw 195 te chu Special Intensive Revision (SIR) kalpui mekah en uluk leh zual tur leh SIR kalpui a nih tawh pawhin, DEO te nen ennawn leh turin a ngen a, he hmalaknaah hian a tul anga thuneitute thawhpui an inhuam reng thu MZP chuan a sawi bawk a ni.

MZP President chuan, Election Commission of India in Special Intensive Revision (SIR) a kalpui mekah Mizoram State chhunga thawktu Chief Electoral Officer (CEO) leh a thawhpuite chu India khua leh tui dik takte humhimna SIR an kalpui naah dan ang taka hmala turin a ngen a ni.

MZP-chuan kum 2005 atanga kum 2024 inkara khaw 10-a vote pun chhoh dan a tarlan danin, Sumasumy khuaah vote pung nasa berin, zaa 334.61-in a pung a, Gerasury-in dawtin vote zaa 260.71-in a pung a, Damzautlang chu pathumna niin, vote zaa 225.53-in a pung a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PADMA AWARD

Chanchinbumi P.Naraynan hnenah civil mite chawimawina sang ber Padma Vibushan hlan a ni. Nizan khan President Droupadi Murmu-i chuan Padma Award a sem a. Padma Award zinga sang ber Padma Vibhushan hi Judge hlui KT Tomas hnenah hlan a ni bawk a. Kuminah hian Padma Award hi a vaiin award 131 sem tura puan a ni a. Heng zingah hian Padma Vibhushan panga, Padma Bhushan 13 leh Padma Shri 113 sem tura puan a ni a. Nizana award dawngtu langsar zingah Tennis khelthiam Vijay Amritraj, Actor Mammooty, actor R Madhavan , Prasar Bharati CEO hlui Shashi Shekhar Vempati leh Cricketer Rohit Sharma te an tel a ni.

<><><>

NSA

Prime Minister Narendra Modia chaun khawvel dinhmun inthlak nasa tak karah BRICS ramten venhimna lama thawhhona an tih thuk leh zual a tul thu a sawi. Nimina BRICS ram National Security Advisors meetinga telten an kawmnaah he thu

hi sawiin Pu Modia chuan venhimna lama harsatna an tawh tlan firfiaka chetna leh cyber security lamahte an thawhho that a pawimawh thu a sawi a ni. He hunah hian Brazil, Russia, India, China leh South Africa National Security thuneitute an tel a ni.

<><><>

CRISTIANO RONALDO RECORD

FIFA World Cup khelkh mekah nizan khan Group K inkhelah team ngaihven hlawh Portugal chuan goal 5 faiin Uzbekistan an hneh a. He inkhela Portugal tana goal 2 thuntu kum 41 mi Cristiano Ronaldo chuan World Cup record thar siamin World Cup tum 6-a goal thun vek awmchhun a ni a. World Cup 2006,2010,2014,2018,2022 leh 2026 ahte goal a thun vek a ni. Inkhel dangah England leh Ghana te goal awmlovin an inhnehtawh a. Croatia in Panama goal 1 in an hneh a. Tunah hian Columbia leh DR Congo te an inkhel mek bawh a ni.

<><><>